

Plenchi

Bèl a bati

Yega yega na bòshi riba nos Plenchi. Nos ta antisipá riba e dia aki ku nos lo topa pa nos por informá boso di tur loke ta sosode riba plenchi di nos skolnan. Despues di karnaval ta sodamentu pisá tin. Trabou duru di dosente i hobennan pa nan por prepará pa “toetsweek”. Danki Dios tin menos distraishon e temporada aki, ya asina e konsentrashon por ta mihó. Hóbennan preparando pa tuts òf èksamen.

Riba plenchi tin kosnan serio, pero semper tin algun kos chistoso tambe. No perde e kosnan grasioso den bida. E mucha den bo mester keda bibu. E alegria, e grasia i e manera espontaneo mester keda den ambiente sosial.

Lanta un wikènt i hasi kambio na bo kas, den bo kustumbenan, den bo manera di hasi. Skibi un palabra bunita, un poesia un palabra di apresio, pone riba kusunchi di bo yu of ser stímá.

Unbes pa siman, skohe un persona ku masha tempu bo no a mira of tende di dje i bèl e of pasa bishité.

Lanta for di soño traha algu di smak pa desayuno pa sorpesá bo yunan. Kòrda riba bo mama tambe. Kòrda ku mama semper ta duna i yu nan ta kustumbrá ku mama ta esun ku ta duna sin spera nada bèk. Pero kòrda ku nan tambe gusta un kariño èkstra. Un atenshon speshal di bo pé.

Maske karnaval a pasa nos ke pa bo sa ken ta e prens di karnaval hubenil 2015. Ta un hóben sumamente talentoso ku nos ta masha orguyoso di dje. Despues ku bo a gosa karnaval, baila i pasa bon, sinta awor i sera konosí ku e persona ku ta prens di karnaval 2015.

Riba roster

Bo mester plania plaser i tambe debernan di tur dia. Aki un yudansa pa bo.



Bo mes pone ora den e plachinan pa bo yu i abo tambe siña plania e dia.

Mi ta konta

E berdat

Stefano (8) ku Jorden (5) a hana informashon na skol riba derechi di mucha. Nan dos ta di akuerdo ku mucha mester tin mas derechi na Korsou. Stefano, ku ta mas grandi ta haña ku esun mas grandi mester tin mas derechi. Jorden ta haña ku esun mas chiki mester tin mas derechi paso e ta mas mucha chikí, anto e kos yama derechi di mucha. Nan mayornan ta sinta ketu ta tende nan ta diskuti. Nan ta ansioso di mira kon e diskushon ta kaba.

Despues ku nan dos no a sali afo, nan a disidi di pidi nan tata yudansa. Stefano: "Papi ken tin rason? Ami of Jorden? Kua di nos tin mas derecho."

Nan tata a hisa su skouder.

Nan a bai serka nan mama ku mesun pregunta. Mami tambe a hasi seña ku e no sa. Stefano i Jorden a bira inpasiente, pero disidido ku awe si nan mester sa kon ta yega na e berdat.

Stefano: “Papi kuantu aña bo mester tin pa bo sa kiko ta bèrdat?”

E tata ta hisa su skouder.

“Papi, kuantu skol mi mester kaba promé mi por sa bèrdat?”

Su tata ta hisa su skouder.

“Papi ta ora nos subi haltu yega serka banda di Dios nos ta sa bèrdat?”

E tata a wak e i a kontesté asina aki:

“E bèrdat bo ta hañe abou na suela, serka banda di bo pia. Pero nos no gusta bùk pa buska e bèrdat.”

Un preñchi

Curtis Doran Prens Sifra

Curtis Doran, 11 aña di edat, ta alumno di grupo Flamboyan (LOM) na skol Alablanka. Curtis ta un mucha alegre. E ta gusta hasi prèt. E tin hopi talento pa kanto, baile, tokamentu i drama. Curtis ta gusta hasi lès di rekenen. Ku hopi dedikashon e ta traha su sòmnan na skol.

Dia 11-1-2015, ku ta dia ku el a kumpli 11 aña el a partisipá na elekshon di prens ku pancho hubenil. Komo prens sifra huntu ku su pancho letra nan a trese un mensahe tokante siñamentu. Nan a duna un tremendo presentashon. Nan kantika : “hasi bo lès bailando” i e rèp ku ta stimulá muchanan pa nan komportá i siña na skol, a kai hopi na smak serka e públiko presente. Curtis Doran a ser koroná komo prens hubenil 2015.

Curtis ta demostrá ku e mes ta biba e mensahe ku el a trese den su presentashon. Curtis ta na skol tur dia, komportá i hasi su lèsnan ku dedikashon.

Nos di skol Alablanka ta sumamente orguyoso di e logro aki i nos ta spera ku e mensahe di e duo aki ta yega serka tur mucha.



Curtis ku su amigitonan i yufrou na Ala Blanka school



**Rei tumba 2015 Amos Balentien huntu ku
Prens Sifra 2015 Curtis Doran na entrada di skol Alablanka**

Mucha djispou



